

Na osnovu člana 56. stav (2) Zakona o graničnoj kontroli ("Službeni glasnik BiH", broj 53/09) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na 115. sjednici održanoj 18. februara 2010. godine, donijelo je

PRAVILNIK O NAČINU OBAVLJANJA KONTROLE PRENOSA ORUŽJA I MUNICIJE PREKO DRŽAVNE GRANICE

I - Opće odredbe

Član 1. (Predmet Pravilnika)

Ovim pravilnikom propisuje se način obavljanja kontrole prenosa oružja i municije preko državne granice, koju provode policijski službenici Granične policije Bosne i Hercegovine (u daljnjem tekstu: GP BiH) i carinski službenici Uprave za indirektno oporezivanje Bosne i Hercegovine (u daljnjem tekstu: UINO) prilikom kontrole državljana Bosne i Hercegovine i stranih državljana.

Član 2. (Vrste oružja i municije)

(1) Oružje u smislu ovog pravilnika razvrstava se na:

- a) kratko ili kratkocijevno vatreno oružje;
- b) sportsko oružje;
- c) lovačko oružje;

(2) Municija u smislu ovog pravilnika razvrstava se na:

- a) metke,
- b) patrone,
- c) čahure sa upaljačem/kapislom,
- d) kapisle;
- e) zrna,
- f) zrna za vazdušno oružje;
- g) kugla;
- h) sačma;
- i) barut; i
- j) signalna, anestetična i gasna punjenja.

Član 3. (Definicije)

Pojedini izrazi upotrijebljeni u ovom pravilniku imaju sljedeće značenje:

- a) *Kratko ili kratkocijevno vatreno oružje* je oružje do kalibra 13,97 mm ili 0,55 inča, čija cijev nije duža od 30 cm, a ukupna dužina ne prelazi 60 cm;
- b) *Sportsko oružje* je dugo vatreno oružje, sa ili bez optičkog nišana, glatkih cijevi do kalibra 12 mm, užlijebljenih cijevi do kalibra 8,61 mm, odnosno 0,338 inča i kratko oružje do kalibra 11,43 mm, odnosno 0,45 inča, te drugo oružje koje se koristi u sportskim disciplinama;
- c) *Lovačko oružje* je lovačka puška, sa ili bez optičkog nišana, kalibra 4 - 36 (glatka cijev) ili lovački karabin kalibra 6,5 - 8 mm (užlijebljena cijev) koji se koristi radi bavljenja lovom;
- d) *Municijom* u smislu ovog pravilnika smatraju se: meci, patrone, čahure sa kapislama, kapisle, zrna, zrna (kuglice-dijabole) za vazdušno oružje, kugle, sačma, barut kao i signalna, anestetična i gasna punjenja, čija je osnovna namjena korištenje za oružja navedena u članu 2. stav 1. ovog pravilnika;
- e) *Prenos oružja i municije* preko državne granice (ulaz/izlaz/tranzit) podrazumijeva prenošenje oružja i municije, državljana Bosne i Hercegovine ili stranih državljana, koji prilikom kontrole posjeduju potrebnu dokumentaciju;
- f) *Nadležnim organom* u smislu ovog pravilnika smatraju se institucije i tijela nadležna za postupanje po propisima u Bosni i Hercegovini koji se odnose na oružje i municiju.

Član 4.
(Nadležni organi)

U smislu ovog pravilnika nadležni organi su:

- a) Ministarstvo sigurnosti Bosne i Hercegovine,
- b) Ministarstvo vanjske trgovine i ekonomskih odnosa Bosne i Hercegovine,
- c) Ministarstvo inostranih poslova Bosne i Hercegovine;
- d) Diplomatsko konzularno predstavništvo Bosne i Hercegovine (DKP BiH),
- e) Uprava za indirektno-neizravno oporezivanje Bosne i Hercegovine,
- f) Granična policija Bosne i Hercegovine,
- g) Ministarstvo unutrašnjih poslova Federacije Bosne i Hercegovine,
- h) Ministarstvo unutrašnjih poslova Republike Srpske,
- i) Policija Brčko Distrikta Bosne i Hercegovine,

- j) Kantonalna ministarstva unutrašnjih poslova,
- k) Drugi organi i tijela nadležna za postupanja u vezi sa prenosom oružja i municije preko državne granice.

Član 5.
(Dokumenti)

Dokumenti izdati od strane nadležnih organa iz člana 4. ovog pravilnika, koji se prilikom kontrole prenosa oružja i municije provjeravaju, u zavisnosti od svrhe prenošenja oružja i municije, su:

- a) Odobrenje za unošenje oružja i municije,
- b) Odobrenje za iznošenje oružja i municije,
- c) Odobrenje za privremeni uvoz/izvoz/tranzit oružja i municije,
- d) Odobrenje za nabavku oružja i municije,
- e) Dozvola za držanje i nošenje oružja i municije,
- f) Odobrenje za tranzit oružja i municije (DKP BiH),
- g) Važeća putna isprava,
- h) Odobrenje boravka,
- i) Poziv lovačkog društva,
- j) Poziv organizatora sportskog takmičenja,
- k) Potvrda o primopredaji oružja i municije (avion/brod).

Član 6.
(Granični prelazi za prenošenje oružja i municije)

- (1) Prenošnje oružja i municije iz člana 2. ovog pravilnika može se vršiti na svim međunarodnim graničnim prelazima u Bosni i Hercegovini.
- (2) Oružje i municija ne mogu se prenositi preko graničnih prelaza za pogranični saobraćaj, osim ako međunarodnim sporazumom nije drugačije određeno.

II - Kontrola prenosa oružja i municije

Član 7.

(Kontrola prenosa kratkog ili kratkocijevnog vatrenog oružja i municije)

- (1) Prilikom prenosa kratkog ili kratkocijevnog vatrenog oružja i municije preko državne granice Bosne i Hercegovine, policijski službenik GP BiH i carinski službenik UINO, zajedno vrše kontrolu i provjeravaju da li osoba koja prenosi oružje i municiju posjeduje odgovarajuće odobrenje izdato od nadležnog organa.
- (2) U slučaju kada osoba iz stava (1) ovog člana posjeduje potrebnu dokumentaciju, popunjava obrazac zahtjeva za prenošenje oružja i municije preko državne granice (prilog 1 ovog pravilnika), u tri primjerka, i predaje carinskom službeniku UINO na daljnje postupanje.
- (3) Nakon provedenog carinskog postupka, carinski službenik UINO obrazac zahtjeva za prenošenje oružja i municije preko državne granice iz stava (2) ovog člana ovjerava na propisani način.

Član 8.

(Kontrola prenosa lovačkog oružja i municije)

- (1) Prilikom prenošenja lovačkog oružja i municije preko državne granice Bosne i Hercegovine, policijski službenik GP BiH i carinski službenik UINO, zajedno vrše kontrolu i provjeravaju da li osoba koja prenosi oružje i municiju posjeduje odobrenje izdato od nadležnog organa za nošenje oružja i poziv lovačkog društva ili dokaz o članstvu u lovačkom društvu druge države.
- (2) U slučaju kada osoba iz stava (1) ovog člana posjeduje potrebnu dokumentaciju, popunjava obrazac zahtjeva za prenošenje oružja i municije preko državne granice (prilog 2 ovog pravilnika), u tri primjerka, i predaje carinskom službeniku UINO na dalje postupanje.
- (3) Nakon provedenog carinskog postupka, carinski službenik UINO obrazac zahtjeva za prenošenje oružja i municije preko državne granice iz stava (2) ovog člana ovjerava na propisani način.

Član 9.

(Kontrola prenosa sportskog oružja i municije)

- (1) Prilikom prenošenja sportskog oružja i municije preko državne granice Bosne i Hercegovine, policijski službenik GP BiH i carinski službenik UINO, zajedno vrše kontrolu i provjeravaju da li osoba koja prenosi oružje i municiju posjeduje odobrenje izdato od nadležnog organa za nošenje oružja i poziv organizatora sportskog takmičenja.
- (2) U slučaju kada osoba iz stava (1) ovog člana posjeduje potrebnu dokumentaciju, popunjava obrazac zahtjeva za prenošenje oružja i municije preko državne granice (prilog

2 ovog pravilnika), u tri primjerka, i predaje carinskom službeniku UINO na dalje postupanje.

(3) Nakon provedenog carinskog postupka, carinski službenik UINO obrazac zahtjeva za prenošenje oružja i municije preko državne granice iz stava (2) ovog člana ovjerava na propisani način.

Član 10.

(Kontrola prenošenja oružja i municije brodom ili zrakoplovom)

(1) U slučaju kada lice zrakoplovom napušta Bosnu i Hercegovinu, primopredaja oružja i municije vrši se u skladu sa odredbama *Pravilnika o načinu predaje i vraćanja oružja i municije u javnom prijevozu u vazdušnom prometu* (broj 01-29-8-327-7/08 od 31.10.2008 godine), a nakon provedene procedure iz člana 7., 8., 9. ovog pravilnika.

(2) U slučaju kada lice zrakoplovom dolazi u Bosnu i Hercegovinu i posjeduje potrebnu dokumentaciju za prenošenje oružja preko državne granice, primopredaja oružja i municije vrši se u skladu sa odredbama *Pravilnika o načinu predaje i vraćanja oružja i municije u javnom prijevozu u vazdušnom prometu*, nakon čega se provodi postupak iz člana 7., 8., 9. ovog pravilnika.

(3) U slučaju kada lice brodom ili drugim plovilom u međunarodnom vodenom prometu napušta Bosnu i Hercegovinu, nakon provedene procedure iz člana 7., 8., 9. ovog pravilnika, policijski službenik GP BiH prima oružje i municiju, te izdaje potvrdu o prijemu oružja i municije radi prijevoza (prilog 3 ovog pravilnika). Jedan primjerak potvrde izdaje licu od koga je primljeno oružje za prijevoz, dva primjerka kapetanu plovila uz oružje i municiju koje se prevozi, a jedan primjerak zadržava za službene potrebe GP BiH, te vrši evidentiranje u propisanu evidenciju iz člana 17. ovog pravilnika.

(4) U slučaju kada lice brodom ili drugim plovilom u međunarodnom vodenom prometu dolazi u Bosnu i Hercegovinu, primopredaja oružja i municije vrši se na način da policijski službenik GP BiH od kapetana plovila preuzima oružje i municiju, potpisuje i preuzima jedan primjerak potvrde i oružje/municiju, predaje licu koje ga prenosi, uz potpis na potvrdi da je oružje i municija primljena, nakon čega se provodi postupak iz člana 7., 8., 9. ovog pravilnika, ukoliko lice posjeduje potrebnu dokumentaciju za prenošenje oružja preko državne granice. Policijski službenik GP BiH vrši evidentiranje u propisane evidencije iz člana 17. ovog pravilnika.

Član 11.

(Predaja, evidentiranje i čuvanja obrazaca)

(1) Nakon obavljene kontrole iz člana 7., 8., 9. ovog pravilnika, te provedenog carinskog postupka, carinski službenik UINO, jedan primjerak popunjenog i ovjerenog obrasca o prenosu oružja, kod uvoza/izvoza/tranzita (prilog broj 1 ili 2 ovog pravilnika), uručuje licu koje prenosi oružje i municiju, jedan primjerak predaje policijskom

službeniku GP BiH sa kojim je obavljao kontrolu prenosa oružja, a jedan primjerak zadržava za službene potrebe, odlaže po redosljedu izdavanja i čuva tri godine od dana izdavanja.

(2) Lice kojem je, nakon obavljene kontrole iz člana 7., 8., 9. ovog pravilnika, odobren prenos oružja i municije preko državne granice, prilikom povratka u Bosnu i Hercegovinu, odnosno odlaska iz Bosne i Hercegovine dužno je carinskom službeniku UINO dati na uvid (uz oružje i municiju) obrazac iz priloga 1 i 2 ovog pravilnika radi razduženja carinskog postupka. Kopiju ovjerenog obrasca (prilog 1 ili 2 ovog pravilnika), nakon razduženja carinskog postupka, carinski službenik UINO vraća licu koje je prenosilo oružje i municiju, te evidentira razduženje. Carinski službenik UINO sačinjava jednu kopiju za policijskog službenika GP BiH sa kojim je obavljao kontrolu prenosa oružja i municije i istu mu predaje na daljnje postupanje.

(3) Policijski službenik GP BiH, koji je vršio zajedničku kontrolu prenosa oružja i municije sa carinskim službenikom UINO i koji je zaprimio primjerak obrasca o prenosu oružja i municije preko državne granice iz stava (1) i (2) ovog člana, podatke iz obrazaca unosi u evidenciju propisanu članom 59. stav (1) tačka g) Zakona o graničnoj kontroli ("Službeni glasnik BiH", broj 53/09), te odlaže i čuva tri godine od dana izdavanja.

Član 12.

(Obavještanje nadležnog organa)

(1) Kada oružje iz člana 7., 8., 9. ovog pravilnika preko državne granice prenosi stranac sa odobrenim privremenim ili stalnim boravkom u Bosni i Hercegovini, policijski službenik GP BiH dužan je da odmah u pisanoj formi obavijesti nadležni organ unutrašnjih poslova po mjestu prebivališta/boravišta tog stranca.

(2) Obavještenje iz stava (1) ovog člana treba da sadrži: granični prelaz preko kojeg je izvršen prijenos oružja i municije, datum i vrijeme prelaska, lične podatke o licu, broj putne isprave, broj stikera odobrenja boravka, važenje boravka, vrsta oružja, marka, tvornički broj, kalibar, vrsta municije, količina i kalibar.

III - Privremeno oduzimanje oružja i municije

Član 13.

(Oduzimanje oružja i municije)

(1) U slučaju kada lice iz člana 7. stav (1), člana 8. stav (1), člana 9. stav (1) ovog pravilnika, prilikom prenošenja oružja i municije preko državne granice, ne posjeduje potrebnu dokumentaciju, policijski službenik GP BiH, od istog oduzima oružje i municiju, popunjava obrazac potvrde o privremenom oduzimanju predmeta (prilog 4 ovog pravilnika) u četiri primjerka, te daljnje postupa u skladu sa odredbama Zakona o graničnoj kontroli.

(2) U slučaju kada lice iz člana 7. stav (1), člana 8. stav (1), člana 9. stav (1) ovog pravilnika, prilikom prenošenja oružja i municije preko državne granice, policijskom službeniku GP BiH ili carinskom službeniku UINO, ne prijavi oružje i municiju prije početka obavljanja granične kontrole, policijski službenik GP BiH od istog oduzima oružje i municiju, popunjava obrazac potvrde o privremenom oduzimanju predmeta (prilog 4 ovog pravilnika) u četiri primjerka, te daljnje postupa u skladu sa odredbama Zakona o graničnoj kontroli.

Član 14.

(Gubitak ili otuđenje prenesenog oružja)

(1) U slučaju da lice prilikom prelaska državne granice, odnosno odlaska iz Bosne i Hercegovine, policijskom službeniku GPBiH ili carinskom službeniku UINO prijavi gubitak, nestanak ili krađu oružja i municije, za koje mu je izdat obrazac o prenosu oružja i municije (prilog 1 ili 2 ovog pravilnika), lice će se uputiti nadležnom organu po mjestu prebivališta/boravišta ili mjestu nestanka oružja i municije ili u najbliži mjesno nadležni organ radi prijave nestanka oružja/municije, osim u slučaju da kod sebe već posjeduje potvrdu-dokaz nadležnog organa unutrašnjih poslova o prijavi nestanka tog oružja/municije.

(2) Primjerak potvrde-dokaza nadležnog organa o prijavljenom nestanku oružja i municije policijski službenik GP BiH i carinski službenik UINO, nakon obavljene kontrole i savjetovanja, odlažu uz obrazac zahtjeva za prenošenje oružja i municije (prilog 1 ili 2 ovog pravilnika) koji je izdat tom licu, te evidentiraju u propisane evidencije.

(3) Prelazak državne granice, odnosno odlazak iz Bosne i Hercegovine, neće se dozvoliti licu iz stava (1) ovog člana ukoliko kod sebe ne posjeduje oružje i municiju za koju mu je izdat obrazac o prenosu oružja i municije (prilog 1 ili 2 ovog pravilnika) ili odgovarajuću potvrdu, odnosno drugi dokaz nadležnog organa unutrašnjih poslova o prijavi nestanka tog oružja i municije.

IV - Supsidijarna primjena drugih propisa

Član 15.

(Postupanje po dugim propisima)

Postupanje policijskih službenika GPBiH i carinskih službenika UINO u skladu sa ovim pravilnikom ne isključuje postupanja u skladu sa drugim propisima koji regulišu oblast prometa oružja, municije, vojne opreme, opasnih i eksplozivnih materija.

V - Prikupljanje ličnih podataka i evidencije

Član 16.

(Prikupljanje, obrada i korištenje podataka)

(1) Prilikom obavljanja kontrole prenosa oružja i municije preko državne granice i drugih poslova iz ovoga pravilnika, policijski službenici GPBiH ovlašteni su neposredno prikupljati lične podatke od lica koja prenose oružje i municiju, pohranjivati i obrađivati te podatke u evidencijama, te koristiti lične i druge podatke iz evidencija.

(2) GPBiH je dužna pri prikupljanju, obradi i korištenju podataka iz stava (1) ovoga člana pridržavati se odredaba Zakona o zaštiti ličnih podataka ("Službeni glasnik BiH", br. 54/05 i 12/09).

Član 17. (Vođenje evidencija)

Pored evidencija propisanih članom 59. stav (1) tačka f) i g) Zakona o graničnoj kontroli, GP BiH vodi i sljedeće evidencije:

- a) Evidenciju o izdatim potvrdama o prenosu oružja i municije u vazдушnom saobraćaju;
- b) Evidenciju o izdatim potvrdama o prenosu oružja i municije u vodenom saobraćaju.

Član 18. (Lični podaci)

U evidenciji iz člana 17. stav (1) tačke a) i b) ovog Pravilnika prikupljaju se, pohranjuju i obrađuju sljedeći podaci: ime i prezime, podaci o rođenju, državljanstvo, podaci o ispravama na osnovu kojih je utvrđen identitet, podaci o vrsti, marki, tvorničkom broju, kalibru i dodatku oružja, podaci o vrsti, količini i kalibru municije, broj plovne rute linije, broj leta i luka polaska /dolaska.

Član 19. (Rokovi čuvanja podataka)

(1) Podaci u evidenciji iz člana 59. stav (1) tačka g) Zakona o graničnoj kontroli čuvaju se tri godine nakon unosa u evidenciju.

(2) Podaci u evidenciji iz člana 17. stav (1) tačke a) i b) ovog pravilnika čuvaju se tri godine nakon unosa u evidenciju.

Član 20. (Usporedba podataka)

(1) U cilju kontrole primjene odredbi ovog pravilnika GP BiH i UINO, na graničnim prelazima, jedanput mjesečno vrše usporedbu podataka iz evidencija o prenosu oružja i municije, te o tome izvještavaju Glavni ured GP BiH i Središnji ured UINO.

(2) U slučaju da se prilikom usporedbe podataka iz stava (1) ovog člana pojave razlike, Glavni ured GP BiH i Središnji ured UINO preduzimaju službene radnje radi utvrđivanja razloga nastanka razlike u evidencijama.

VI - Prijelazne i završne odredbe

Član 21. (Prilog Pravilnika)

Sastavni dio ovog Pravilnika čine:

- a) obrazac zahtjeva za prenošenje oružja i municije preko državne granice (prilog 1 i 2);
- b) potvrda o prijemu oružja i municije radi prijevoza (prilog 3);
- c) obrazac potvrde o privremenom oduzimanju oružja i municije (prilog 4),

Član 22. (Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".

VM broj 66/10
18. februara 2010. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.